



*Iacob poursuivant son chemin, sacrifie à Dieu, qui le benit, & le nomme Israël :  
Sa femme Rachel decede, & son pere Isaac.*

**I**ACOB continuant son chemin, Dieu s'apparut à luy, & luy commanda de purifier ses tentes, afin de luy parfaire le Sacrifice qu'il auoit voué au voyage de Mesopotamie, apres la reuelation celeste qui luy fut faite, lors qu'il fuyoit la fureur de son frere Esäu. Parquoy Iacob fit ainsi que Dieu luy auoit commandé, & sacrifia sur la pierre qu'il auoit auparauant remarquée, & versa de l'huile sur icelle. Adonc Dieu luy dist, Ton nom ne sera plus Iacob, ains seras nommé Israël: & sortiront de toy grandes generations, qui iouiront de la terre que j'ay baillée à Abraham, & à Isaac ton pere. Or Iacob partit de ce lieu, & s'achemina au pais qui mene en Ephrata, où Rachel enfanta Benjamin, avec vn si long & fascheux trauail qu'elle en mourut, & fut ensepulturée en Bethel, dont Iacob fit grand deüil, & posa vn tiltre sur sa sepulture. Apres ces choses Iacob partit de ce lieu, étendit son tabernacle pour faire quelque sejour, dont aduint que Ruben fut incestueux, & dormit avec Bala, concubine de son pere; lequel en fut fort courroucé contre luy, qui estoit le premier enfant des douze qui nasquirent en Mesopotamie, dont les noms sont assez connus. Finalement Iacob vint en Hebron, où Isaac son pere âgé de neuf vingts ans, alla de vie à trépas, & fut mis en sepulture par luy, & par Esäu.